



REPUBLIKA E SHQIPËRISË

**KOMISIONERI PËR MBIKËQYRJEN E SHËRBIMIT CIVIL
DREJTORIA E PËRGJITHSHME E INSPEKTIMIT DHE MBIKËQYRJES**

Nr. 784/4 prot.

Tiranë, më 29.10.2025

V E N D I M

Nr. 45, datë 29.10.2025

**MBI PËRFUNDIMIN E VLERËSIMIT TË LIGJSHMËRISË, SË VEPRIMEVE
ADMINISTRATIVE TË KRYERA GJATË PROCESIT TË VLERËSIMIT TË
REZULTATEVE NË PUNË, PËR PERIUDHËN JANAR - QERSHOR, VITI 2025, SI
DHE LIRIMIN NGA SHËRBIMI CIVIL PËR NËPUNËSIN AUREL REXHAJ, NË
INSTITUCIONIN E KONTROLLIT TË LARTË TË SHETIT**

Në mbështetje të kompetencave ligjore të parashikuara në pikën 1, të nenit 11, nenet 14 dhe 15, të ligjit nr. 152/2013 “Për nëpunësin civil”, i ndryshuar, të ligjit nr. 44/2015 “Kodi i Procedurave Administrative i Republikës së Shqipërisë”, si dhe Rregullores “Mbi procedurat e mbikëqyrjes/inspektimit”, miratuar me vendimin nr. 17, datë 11.03.2015, të Komisionerit, e ndryshuar, pas shqyrtimit të relacionit të Drejtorisë së Përgjithshme të Inspektimit dhe Mbikëqyrjes, në përfundim të verifikimit të veprimeve administrative të kryera gjatë procesit të vlerësimit të rezultateve në punë, për periudhën Janar- Qershor, viti 2025, për nëpunësin Aurel Rexhaj, në institucionin e Kontrollit të Lartë të Shtetit,

VËREJ SE:

Pranë Komisionerit për Mbikëqyrjen e Shërbimit Civil është regjistruar informacioni i dërguar me shkresën nr. 784 prot., datë 22.8.2025, të paraqitur nga nëpunësi Aurel Rexhaj, në përmbajtje të së cilës ngrihen pretendime për parregullsi të kryera në zbatimin e legjislacionit të shërbimit civil, gjatë procesit të vlerësimit të rezultateve në punë, për periudhën e vlerësimit Janar - Qershor, viti 2025 për nëpunësin, gjatë ushtrimit të detyrës si “*Auditues i IP*”, në Departamentin e Auditimit të Performancës, Sektori i Auditimit të Performancës, në institucionin e Kontrollit të Lartë të Shtetit, si dhe lirimin e tij nga shërbimi civil.

Konkretisht, në përmbajtje të informacionit dhe të dokumentacionit të administruar bashkëlidhur tij, parashtrohet se, punonjësi Aurel Rexhaj për periudhën e vlerësimit Janar – Qershor, viti 2025, ka qenë i emëruar në pozicionin “*Auditues i IP*”, në Departamentin e Auditimit të Performancës, Sektori i Auditimit të Performancës, në institucionin e Kontrollit të Lartë të Shtetit.

Në vijim të marrëdhënies së punësimit në këtë pozicion pune, në zbatim të detyrimit të parashikuar në nenin 62, të ligjit nr. 152/2013 “*Për nëpunësin civil*”, i ndryshuar, si dhe të vendimit nr. 109, datë 26.2.2014, të Këshillit të Ministrave “*Për vlerësimin e rezultateve në punë të nëpunësve civilë*”, i ndryshuar, nga ana Zyrtarit Raportues, është kryer vlerësimi i rezultateve në punë për 6 mujorin e parë të vitit 2025, konkretisht për periudhën Janar – Qershor, viti 2025, për këtë nëpunës.

Në përfundim të procesit të vlerësimit të arritjeve dhe rezultateve në punë, për periudhën Janar – Qershor, viti 2025, nga ana e Zyrtarit Raportues, në datën 3.7.2025, nëpunësi është vlerësuar me nivelin 3 “*Kënaqshëm*”, ndërsa Zyrtari Autorizues nuk ka qenë dakord me vlerësimin dhe e ka vlerësuar nëpunësin me nivelin 4 “*Jo kënaqshëm*”.

Duke mos qenë dakord me vlerësimin, nëpunësi, në mbështetje të pikës 1, të kreut V, të VKM-së nr.109, datë 26.2.2014, ka kërkuar shqyrtim të vlerësimit nga zyrtari Autorizues, nënshkruar në datën 15.7.2025.

Në vijim, Zyrtari Autorizues ka kryer procesin e rivlerësimit, duke e vlerësuar nëpunësin me të njëjtin nivel vlerësimi 4 “*Jo kënaqshëm*”, si dhe e ka njoftuar këtë të fundit për rezultat in e rivlerësimit, në datën 21.7.2025. Nëpunësi është shprehur se, nuk është dakord me vlerësimin, fakt të cilin e ka pasqyruar në plotësimin e pikës 2, të nëndarjes “*DH*”, të formularit të vlerësimit, duke deklaruar se do ta ankimoj në rrugë gjyqësore vlerësimin e rezultateve në punë për periudhën Janar- Qershor, viti 2025.

Për më tepër, në përmbajtje të këtij informacioni dhe të dokumentacionit bashkëlidhur tij, parashtrohet se, procedura e vlerësimit dhe rivlerësimit të rezultateve në punë nga ana e Zyrtarit Autorizues, është kryer në kundërshtim me përcaktimet e ligjit nr. 152/2013 “*Për nëpunësin civil*”, i ndryshuar, si dhe vendimit nr.109, datë 26.2.2014, të Këshillit të Ministrave “*Për vlerësimin e rezultateve në punë të nëpunësve civilë*”, i ndryshuar, pasi, nuk janë respektuar elementët proceduralë, të cilët kanë ndikuar në arritjen e konkluzioneve të padrejta, në vlerësimin e performancës në punë të këtij nëpunësi.

Ndërsa për sa i takon përmbajtjes së procesit, pretendohet se, vlerësimi dhe rivlerësimi i kryer ka qenë i pa argumentuar dhe i pabazuar në një shqyrtim objektiv të rrethanave dhe ecurisë së punës, ashtu si përcaktohet në kërkesat e akteve ligjore që rregullojnë këtë aspekt të zbatimit të ligjit, duke arsyetuar se mungojnë komentet nga ana e Zyrtarit Autorizues, në nëndarjen “*DH*”, të formularit të vlerësimit të rezultateve në punë, për punonjësin, si dhe nuk përputhet niveli i vlerësimit ndërmjet Zyrtarit Raportues dhe Zyrtarit Autorizues.

Nisur nga fakti se, për nëpunësin janë dhënë 2 vlerësime të njëpasnjëshme, me nivelin 4 “*Jo kënaqshëm*”, me aktin nr. 803 prot., datë 25.7.2025, “*Vendim për lirim nga shërbimi civil*”, të Drejtorit të Burimeve Njerëzore, në institucionin e Kontrollit të Lartë të Shtetit, është vendosur lrimi nga shërbimi civil i nëpunësit Aurel Rexhaj, me detyrë “*Auditues i II*”, pranë këtij institucioni.

Në këto kushte, punonjësi në fjalë, ka kërkuar ndërhyrjen e Komisionerit për Mbikëqyrjen e Shërbimit Civil, për verifikimin dhe vlerësimin e ligjshmërisë së veprimeve të kryera nga ana e subjekteve të ngarkuara prej ligjit, me detyra specifike gjatë realizimit të procesit të vlerësimit të rezultateve në punë dhe verifikimin e ligjshmërisë aktit të lirit nga shërbimi civil.

Më tej, në zbatim të kompetencave ligjore të parashikuara në nenet 11, 14 dhe 15, të ligjit nr.152/2013 “*Për nëpunësin civil*”, i ndryshuar, Komisioneri ka vlerësuar se ka dyshime të arsyeshme për parregullsi të lejuara gjatë administrimit të shërbimit civil, e në këto rrethana ka filluar procesin e verifikimit të informacionit nëpërmjet shkresës nr. 784/1 prot., datë 19.9.2025 “*Kërkesë për dokumentacion në lidhje verifikimin e informacionit të dërguar pranë Komisionerit me shkresën nr. 784 prot., datë 22.8.2025*”, ka vënë në dijeni institucionin e KLSH-së, duke i kërkuar edhe dokumentacionin e nevojshëm në të cilin materializohet procedura e vlerësimit të rezultateve në punë, për periudhën Janar – Qershor, viti 2025, për nëpunësin A. Rexhaj.

Në përgjigje të kësaj kërkesë, institucioni me shkresën nr. 910/1 prot., datë 23.9.2025, “*Dërgim dokumentacioni për punonjësin Aurel Rexhaj*”, të Sekretarit të Përgjithshëm, protokolluar pranë Komisionerit me shkresën nr. 784/2 prot., datë 24.9.2025, ka paraqitur dokumentacionin përkatës për rastin konkret, duke përfshirë:

- Aktin nr. 21/12 prot., datë 16.4.2018, të Kryetarit, për emërimin në detyrë të punonjësit Aurel Rexhaj, si nëpunës civil në periudhë prove;
- Aktin e deklaramit të statusit të punësimit nr. 21/21 prot., datë 10.6.2019, të Kryetarit, për punonjësin në fjalë;
- Formularin e Planit Individual të punës për vitin 2025;
- Formularin e bisedimeve të ndërmjetme për arritjen e objektivave të planifikuara për vitin 2025;
- Formularin e vlerësimit, për periudhën e vlerësimit Janar – Qershor, viti 2025;
- Aktin nr. 803 prot., datë 25.7.2025, “*Vendim për lirim nga shërbimi civil*”, të Drejtorit të Burimeve Njerëzore, pranë institucionit të Kontrollit të Lartë të Shtetit;
- Aktin nr. 803/1 prot., datë 25.7.2025, “*Ndërprerje të marrëdhënieve të punës dhe financiare*”, të Kryetarit të Kontrollit të Lartë të Shtetit.
- Kërkesë padinë e z. Aurel Rexhaj, drejtuar Gjykatës Administrative të Shkallës së Parë Tiranë.

Në këto rrethana, rezulton se, nëpunësi Aurel Rexhaj, në mbështetje të nenit 41, pika 3, të ligjit nr. 152/2013 “Për nëpunësin civil”, i ndryshuar, ka ushtruar të drejtën e ankimit, për të gjitha pretendimet e tij, pranë Gjykatës Administrative të Shkallës së Parë Tiranë, të cilës i është drejtuar me kërkesë padi, duke kërkuar:

- Shfuqizimin e formularit të vlerësimit të punës për nëpunësin civil të kategorisë ekzekutive, të ulët dhe të mesme drejtuese, për periudhën Korrik-Dhjetor, viti 2024;
- Shfuqizimin e formularit të vlerësimit të punës për nëpunësin civil të kategorisë ekzekutive, të ulët dhe të mesme drejtuese, për periudhën Janar- Qershor, viti 2025, të paditësit Aurel Rexhaj;
- Shfuqizimin e vendimit nr. 803 prot., datë 25.7.2025, “Për lirim nga shërbimi civil” , të Drejtorit të Burimeve Njerëzore, i Kontrollit të Lartë të Shtetit dhe rikthimin në detyrën e “*Auditues i Dytë*”, ose pozicion ekuivalent me të, si dhe pagimin e pagës bruto nga momenti i lirimit deri në rikthimin në detyrë.
- Shfuqizimin e vendimit nr. 803/1 prot., datë 25.7.2025 “*Ndërprerje e marrëdhënies së punës dhe financiare*” (lirim nga shërbimi civil), të Kryetarit të Kontrollit të Shtetit.
- Dhënien e vendimit me ekzekutim të përkohshëm (neni 317/1, b, i Kodit të procedurës Civile.

Sa më sipër, Komisioneri vlerëson se, referuar paragrafit 3, të nenit 36, të ligjit nr.8116, datë 29.3.1996, “*Kodi i Procedurës Civile i Republikës së Shqipërisë*”, i cili sanksionon se, asnjë institucion tjetër nuk ka të drejtë të pranojë për shqyrtim një mosmarrëveshje civile që është duke u gjykuar nga gjykata, hetimi administrativ nuk mund të vijojë më tej, pasi rasti në fjalë do të zgjidhet në mënyrë përfundimtare nëpërmjet një vendimi gjyqësor ku do të rregullohen edhe pasojat e ardhura.

Për këtë arsye:

Në mbështetje të kompetencës së përcaktuar në nenin 11, pika 1, nenet 14 dhe 15, të ligjit nr.152/2013 “Për nëpunësin civil”, i ndryshuar; të nenit 90, pika 2, të ligjit nr.44/2015 “*Kodi i Procedurave Administrative i Republikës së Shqipërisë*”, i ndryshuar; të nenit 36, të ligjit nr.8116, dt. 29.3.1996 “*Kodi i Procedurës Civile*”, i ndryshuar, si dhe në mbështetje të nenit 16, pika 6, e Rregullores “*Mbi procedurat e mbikëqyrjes/inspektimit*”, miratuar me Vendimin nr. 17, datë 11.03.2015, të Komisionerit për Mbikëqyrjen e Shërbimit Civil, e ndryshuar,

VENDOSA:

1. Përfundimin e hetimit administrativ dhe arkivimin e çështjes së filluar kryesisht në mbështetje të informacionit të përcjellë me shkresën nr. 784 prot., datë 22.8.2025, të dërguar nga nëpunësi Aurel Rexhaj, pasi mosmarrëveshja është bërë objekt i shqyrtimit gjyqësor dhe do të zgjidhet në themel nga gjykata kompetente.

2. Të njoftohet për këtë vendim institucioni i Kontrollit të Lartë të Shtetit, si dhe nëpunësi Aurel Rexhaj.

Ky vendim hyn në fuqi menjëherë.

KOMISIONERI

Pranvera Strakosha